

續永清縣志目錄

第一卷

皇言紀

恩澤紀

第二卷

沿革紀

輿地圖

第三卷

建置圖

第四卷

水道圖

第五卷

職官表 補遺附

第六卷

選舉表 補遺附

第七卷

封贈表

廢襲表

第八卷

吏書

戶書

第九卷

禮書

兵書

刑書

工書

第十卷

政略續編

補遺附

賈慶檀列傳

丁卯殉難諸人附

劉源灝劉源濬劉毓崑列傳

孝友列傳

第十一卷

列女列傳

第十二卷

闕訪列傳

流寓列傳

續前志列傳

第十三卷

風土志

雜志

第十四卷

續志臆言

續永清縣志卷第十

政畧續編

知縣畢昌緒山東淄川人癸酉拔貢道光二十一年任未下車卽布衣芒屨潛訪卹鎮間稔民利病遇事果斷閭邑稱神明強梗皆聞風屏氣邑城地勢汙下又當桑乾下游昌緒顧歎曰脫遭河患土城得毋成巨浸乎爰集紳耆度形勢築堤堰月餘竣工是年永定河決邑南數十卹罹水患炊烟多不繼昌緒省災請賑先罄橐中廉俸給饑民不足則搜括衣物納質庫醵面菜色至前者輒流涕溫卹之民輾轉相謂曰父母愛我如此我等填溝壑何恨在任數年民德之甚爲立去思碑

知縣延彩號紫均山西進士道光二十五年任是年久旱彩甫下車卽齋戒祈雨日三至壇皆步行鄰封未得膏澤邑沛甘霖獨盈

尺百姓懽忭彩亦自喜復有蝗親捕之葛袍草笠督率隴畝間民
獻食率麤糲和凉水咽之邁疾卒蝗不爲災

知縣戴沛字心田雲南文山人癸酉舉人咸豐二年任時大兵四
出近畿州縣供帳絡繹沛念永邑磽瘠不堪供億罄橐代民賠累
他州縣或不勝擾惟永民作息如常催胥未嘗至鄉里民皆欣喜
相謂曰我等擁倉箱而坐視父母傾囊橐忍乎哉於是踴躍捐輸
償俸外尙贏倍蓰沛卻之不得仍存儲爲民應徭役民歌思之勒
碑以紀實焉

知縣蔣元瑞字子珍浙江餘姚人道光己酉舉人咸豐六年任善
理繁劇工聽斷栽培士類文風賴以丕振七年邑內蝗令民捕之
償以貲罄橐中二千餘金金盡日夜焦灼禱於神忽有鐵雀萬餘
啄蝗盡死不爲災民德之爲作鐵雀歌

知縣邱銘勲字丹臣福建閩縣人咸豐己未進士同治八年由武清調署恂恂儒者待人必以誠性慈祥鞠獄有應杖者輒掩面不忍視曰吾無德以化民也倡捐購民地建書院規模宏敞以捐資之半發商生息作脩脯復撥十五村差徭及無糧地十餘頃爲歲修膏火資生童肄業者親爲講解文風日盛士林至今頌之

知縣李秉鈞字衡如湖北漢陽人由軍功保授知縣同治七年在性果敢勇於任事甫接篆卽相度地勢修護城隄植以柳工甫竣而永定河決口城賴以安鄉民被水者巢樹巔秉鈞重貲募小舟數百艘置食物親率以救出入洪濤中舟幾覆者再卒全活無算雖起家行間尤以興文教爲先務籌添書院經費書院旁增設義學及韓村曹家務各設義學復建養濟院於東門外捐廉置地二頃餘又捨地三畝許作義塚一調武清再調薊州均回任十三

年修邑志未成以疾卒

志曰畢公修隄爲民捍患其去思也宜哉延公禦災卒以死勤事
惜已戴公代民賠累而民償之公之仁民之義蓋一舉而兩得焉
蔣公捕蝗而鐵雀降何其神也易俗移風服教從義不資於明察
邱公近之李公數興作歿後稱道勿衰嗚呼可以傳已

政畧補遺

宋楊應詢知信安軍及保定軍霸州塘灤之間地沮洳水潦易集居人浮板以濟應詢增堤防爲長衢濬其旁以泄流民利賴之

宋李邈江西清江人知信安軍有才畧

金馬琪大興寶坻人正隆五年進士任清源主簿三遷永清令永清畿縣號難治前令要介有能聲琪繼以治聞補尙書省令史以永清治最授同知定武軍節度使與中府治中召爲戶部員外郎改侍御史

金彭景直知信安軍有政聲

明邱養性昌黎人由舉人授永清教諭崇禎十四年任次年有薊警與邑令高維岱同嬰城固守城破殉難

邱字舊志作邱今遵御批通鑑輯覽正之

賈慶檀列傳丁卯殉難諸人附

賈慶檀字櫟園生員澎子應鶴五世孫也舉乾隆辛卯武闈第一
歷官河南王祿店營守備嘉慶元年調征川楚教匪每戰輒爭先
凡荆門白雲山襄陽七里山穀城沈家岡南漳倒座廟四川界之
畫石溝數大戰慶檀功最多從經畧額勒登保屢蹙藍號賊張漢
潮於竹谿縣賊擾別營別營乞援他將多畏縮不敢往慶檀請行
帥卒三百人與楊占偕楊占武舉之効力者也途遇潰卒告慶檀
賊勢張甚必勿往所親卒控馬諫曰我爲援師彼奔矣將誰援且
進必無功退固不獲罪慶檀叱曰援師亦殺賊耳彼奔賊固在奈
何不見敵而返急進與賊遇慶檀持火器挾弓矢佩刀俱賊衆萬
餘三百人皆鏖戰賊少却潛出兩翼衷我師師潰楊占沒於陣慶
檀施火器藥盡左右射矢盡掣佩刀刀數十人透圍出佩刀折矣

顧從卒僅三人將由間道歸復遇賊數百遮鬪慶檀謂從卒曰吾今死矣汝等速去他日收吾骨竟前徒手搏遂遇害其地爲湖北竹谿縣之九里岡時嘉慶四年四月初九日也戰之翌日三卒一得歸率其伍求尸於故戰地望見腹隆高尺許衫袂蒙面迫視之良是有創自胸達背其旁血漬草偃者半畝許衆皆哭迭昇歸具冠服殮之時已入夏五日而尸不變目炯炯終不瞑年五十二事聞

贈卹有加予祭葬入祀昭忠祠

葉福棠字宜之世居李家口孝廉葉芬第三子也少喜讀書爲文超異不蹈常踐性果敢勇於任事初應試卽補弟子員繼以科試列優等食餼同治六年歲歉梟匪乘機煽動六月初擾縣境燒毀民居旋奉縣諭舉行團練爲保障計李家口則其兄貢生詠棠及

其堂兄聯棠李永芳張佑趙文林等爲團長福棠曰兄年老戰陣非所宜團練事弟代任之遂集鄉衆修壕立柵製器械籌經費皆首倡焉俟後賊屢窺境內見有備遁去忽於十月二十八日賊大至適邨壕東南隅爲霖雨衝陷賊飛騎數十突入守者皆鄉民不習戰驚怖卻走賊益大肆焚掠福棠見衆潰不支猶振臂大呼毋退羣賊攢刺之遂遇害本縣詳請卹典又經御史馬相如奏請贈雲騎尉世職蔭一子其同時遇害紳士丁勇

恩例各有差崇祀忠義祠

張耀崙李家口人性勇敢當馬賊環集時率鄉民嬰壕拒守鄉民怯敵耀崙獨嗔目大呼持銃轟擊賊中傷不敢前乃繞壕乘隙突入耀崙與格鬪遂被害又有房廷貴者巷戰傷數賊賊大恨羣馳之力殆被殺

張春園字小芳世居小青垵入邑庠爲人樸誠勇於赴義當梟匪蠢動鄉人推爲練長與李家口聯團相犄角賊趨李家口春園協力堵禦遂同時遇害

其同時殉難者又有庠生趙文林葉聯棠李芸翰林院待詔葉莊監生葉紋武生張殿甲文童葉崙葉裕年葉緒葉鶴鳴張毓荃張毓蘭張殿邦武童張殿鰲趙廷和張耀崙民人龐起單雲祥孫鳴祥張倅王桐侯兆熊高慶堂化有文陳殿魁楊俊升王彬單得才王廷海王福林董繼鬢石玉山張志學魯雲峰馮玉儲有榮趙林陳永茂韓士辰李順李桐王小羣劉柏鄭林馮和王永泰龐連城張畫圖趙廷侯王書余廣和宋如蘭陳國棟金國隆王鳳范東立王羣李法孔李水李新田路禿子王起徐丫頭李佳郭清泰王有明李俊楊榮王樞張志學李家容練長文童賈廷獻

志曰文官不愛錢武官不惜死岳忠武語也慶檀不請往可不死
往而不見敵亦不死矢亡刀折間道得還慶檀固可以不死也中
途遇伏慷慨捐軀慶檀不惜死慶檀良可惜矣吾惜慶檀并惜楊
占云

劉源灝劉源濬劉毓崑列傳

劉源灝字鑑泉，靳各莊人。恩賜舉人，國子監學正。綺長子，少穎悟，善讀書。家中落，讀益勤。道光三年癸未成進士，選庶吉士，散館授編修。甲午充山西鄉試正考官。乙未出知揚州府，治獄如神。數十年積案皆清釐，多平反。揚俗浮靡，源灝首崇節儉，敦教化，召各屬高材生來郡讀書，勉以根柢之學，造就甚衆。王凱泰、蔣超伯、其尤著者江督陶文毅公、蘇撫林文忠公，皆相倚重，署常鎮、通海道、清江下游、高郵、設滾水壩。四河水長至一丈二尺，卽開壩洩水。河督張鵬翮舊制也。道光十六年秋，洪澤湖水盛，運河漲發，大吏檄開壩甚急。源灝念壩開則下河數州縣田禾廬舍均被淹沒，力持緩開之議。河帥怒，遣參將張某持令箭飛騎來督視，開壩勢難刻緩。下河居民沿堤數十萬，哭聲震地。源灝泣白：「吾力竭矣，奈水勢不